

**In amatTakwihkwilol
yewal in tatitanil
Pawlos kinkwihkwiloli
in taneltokalme pa in
Wepweblo Epesos**

Carta a los Efesios
en
Meshikan
Nahuat del Este de Durango



LigaBíblica[®]
INTERNACIONAL

Las ilustraciones en la portada y en la página 9 son propiedad de © 1996 David C. Cook Publishing Co., y son usadas con el permiso correspondiente.

Primera edición
Carta a los Efesios
Meshikan
Nahuat del Este de Durango
azd 19-020 2C
©2019 Wycliffe Bible Translators, Inc.

Versión electrónica ©Wycliffe Bible Translators, Inc. 2019
www.scriptureearth.org


Licencia Creative Commons (Reconocimiento-NoComercial-SinObraDerivada 4.0 Unported)

- Compartir — Usted es libre de copiar, distribuir y comunicar públicamente la obra.
- Reconocimiento — Debe reconocer los créditos de la obra.
- No comercial — No puede utilizar esta obra para fines comerciales.
- Sin obras derivadas — No se puede alterar, transformar o generar una obra derivada.

(<http://creativecommons.org/licenses/by-nc-nd/4.0/>)

**In amatTakwihkwilol
yewal in tatitanil
Pawlos kinkwihkwiloli
in taneltokalme pa in
Wepweblo Epesos**

Carta a los Efesios
en
Meshikan
Nahuat del Este de Durango



In amatTakwihkwilol yewal in tatitanil Pawlos kinkwihkwiloli in taneltokalme pa in Wepweblo Epesos

**Pawlos kinkwihkwiloli tonohniwan
taneltokalme inik Epeseyo'**

1 ¹Pawlos, nitatitanil Yehshwa-Kristo kampa yok okinek Dyos, inik ta'onanalme kitekipanoliloya Dyos in taneltokalme pa Yehshwa-Kristo yehwante katkaloya pa Epesos. ²Ma yok Dyos toTats wan in Tats Yehshwa-Kristo ma anmishmak tasotalisteWe wan ma anmishmak sewiliste.

Pawlos kito kampa Dyos han tihmakatiyaske tashtawaliste

³Ma ye ka tamawishtiliste in Dyos yewal niTATS in toTats Yehshwa-Kristo, kampa yewal miyak tishmashti pa mochi tamashtiliste ten kwal pa inik kaha takpakIlwikak pa Kristo. ⁴Dyos otishonan pa yewal, kwah ayamo'ok katkaya in tal, pa tiyeloskya ta'onanalme pa tiktepanoliloskya Dyos wan amo tikpiyaloskya katsawiliste ni'ishpa yewal, pa nitasotalisteDyos. ⁵Dyos okichi pa timochiwaloskya ininpilwam ika yewal Yehshwa-Kristo. Hanwel in ten kwal tamatiya pa kichiwaskya, kampa yok okinek okichi. ⁶Dyos otishonan pa yok tikililoskya tahtolme wehwe pa nitasotalisteWe, in yewal amo kipi tashtawaliste yewal otishmak ika nitasotaliste nikon. ⁷In yEste

yewal Kristo okitotokalti pa nimikiliste otashta totakistiliste pa timomakawaloskya kampa tikatkaloya kina tatsakwalme. In kinek kitos, yewal Dyos han nitasotalisteWe yewal tishih-nili tota'ihhtakoliste. ⁸Dyos otishmak hyeroWe nita'ihniliste ka mochi nitamatiliste wan mochiten kimatiya, ⁹Dyos otish-mashti in ten kitatitikatkaya, hanwel in ten kwal tamatiya pa kichiwaskya, yok okinek okichi inak in Kristo. ¹⁰Pa kimani asiskya in tonat yewal okital, Dyos kinnichikos pa kishki ta-takewaliste ika Kristo pa mochiten, yok kina ten kat pa in ilwikak, wan in yewal ten kat pa tal.

¹¹Niyok ipa Kristo, Dyos otishonan pa tishmakaskya taka-waliste kwah ayamo'ok kipewaltiyaya mochital; kampa yok okinek okichi, kampa yewal kichi pa mochiten motachiwas kina yewal tamatitiyas. ¹²Okichi kampa tehwanite inik yudiyo' pa tiyeloskya nipewaliste kampa timochiyaloskya pa Kristo, kampa moshte tikililoskya tahtolme wehwe ka nitawiliste. ¹³Niyok anmehwanite amo yudiyo', kwah kikakik in tahtol melawak, in nitamashtilisteKwal yewal anmishwalikil takisti-liste pa anmoyololiste wan antaneltokak, pa haniman oyek taseyarilme ka in EspirituSanto yewal okintenewil ya wehka. ¹⁴Ka in EspirituSanto momatis kampa melawak tikonanaske in takawaliste yewal Dyos titishmakas, pa kimani asis ta-makawaliste pa moshte nimasewalme Dyos, pa kiliske moshte tahtolme wehwe ka nitawiliste.

Pawlos kitahtani Dyos pa kinmakas tamatiliste inik taneltokalme

¹⁵Pa kimani onihmat kina anmehwanite antaneltokaloya pa in Tats Yehshwa wan kina ankintasotaloya moshte nita'onanalme nitekipanolme Dyos, ¹⁶amo annimishilka pa nitemakas tashtawaliste pa anmehwanite annimishilnamiki pa kimani niktahtolti Dyos. ¹⁷Niktahtani niDyos in toTats Yehshwa-Kristo, in TATS ka tawiliste, yewal ni'Espiritu ma anmishmak tamatiliste pa kwal anki'ishmatiske. ¹⁸Niktahtani niyok pa anmishilnamikiltis pa anmotamatiliste, pa ankimatiloskya kampa kipi hyero miyak tanotsalite in ankichishtikatkaloya yewal ankipiyal anmehwanite inik ankat tanotsalme, wan hyero miyak kipi nitamashtiliste ika nitakawaliste yewal Dyos kinmak yehwanite nita'onanalme nitekipanolme Dyos,

¹⁹niktahtani niyok pa ankimatiske kina hyeroWe nichikawaliste pa ika tehwanite inik kishki taneltokal. In nichikawaliste amo kipi nitenko; pa moshte kineshti kina we nichikawaliste ²⁰pa kimani okiyolti pa ika mihmihki in Kristo wan okital pa nimahwakwal pa inik kaha ilwikak, ²¹yok ashka onka in Kristo ipa mochiten yehwanite kishki reynarotikat wan inik kishki kipiwal tatakewaliste wan ipa kishki kipiwal chikawaliste wan ipa kishki inik patrone' pa taneltokal, wan ipa inik mochiten kipiwal poderoliste amo hanwel pa ashka in mochtal hanwel niyok pa in yankwik mochtal yewal walas. ²²Dyos okimak Kristo mochiten kampa pa yewal ma ye tatakewaliste wan okital ipa mochiten, yok niyok kina tsontek pa moshte kishki taneltokal. ²³Inik taneltokalme yehwanite kat nikwerpo Kristo, wan yewal kichi kampa mochi pa yes tatamilme wan kintemilti mochiten moteshmonektiyas.

Toyoliliste pa Kristo

2¹Dyos anmishmak yoliliste kimani anmehwanite katka-loya kina mihmihke pa ta'ihntakoliste, wan kichiwaloya ten amokwal. ²Ya wEhka anmehwanite mochantiloya ka ta'ihntakoliste kina oksek masewalme, wan kichiwaloya kina kinekiya niyehyekat tawalilot in wetatakewan yewal kintake oksek niyehyekatim tawalilom in amo nesil pa yehyekat, wan yewal kinchikawaltiyaya pa kichiwaloskya ten amokwal inik amo taneltokaloya pa Dyos. ³Yok niyok moshte tehwanite tiyoliloya ya wehka, tikchiwaloya kina han tihnekiloya ka in mochiten amokwal pa tokwerpo wan tota'lnamikiliste. Kwal katka pa tiyeloskya takokoltilme ka nikwalaniliste Dyos kina moshte oksek. ⁴Ma yok, Dyos miyak ta'ihnili, wan otishnek ka se tasotaliste we, ⁵kampa tishmak yoliliste inak Kristo, pa kimani tikatkaloya mihmihke ka tota'ihntakoliste. Yok ka nita'ihniliste Dyos anmehwanite ankat takistiliste pa in poliwiliste. ⁶Kampa niyok inak Kristo otishyolti, wan okichi pa timotaliloskya ka Kristo Yehshwa pa inik kaha takpakIlwikak. ⁷In okichi pa kineshtis pa inik shiwim yewal walal, in tamashtiliste amo kipi tamachiwaliste ka nitasotalisteWe wan nita'ihniliste yewal kipi ka tehwanite in Kristo Yehshwa. ⁸Ka nitasotalisteWe Dyos anmehwanite yahmo poliptikat pa ika in taneltokaliliste. Anmehwanite amokwal antashtawaloskya pa amo poliwiloskya,

hanwel yewal in nitemakaliste Dyos. ⁹Yewal anmehwante amo ankitanil ka anmotachiwaliste kwahkwalmes yewal ankichiwal, pa amoyok amo'ak mopantilitiyas. ¹⁰Kampa tikat nitachiwaliste Dyos; yewal otishmak yoliliste yankwik ika Kristo Yehshwa wan yok shikchiwak tachiwaliste kwahkwalmes, yewal Dyos yok okital pa tehwanthe ya wehka.

Tikpiyal sewiliste ika Kristo

¹¹Shikilnamikik kampa anmehwante amo antakatik kina yudiyo', akyehwanthe motokayoltil iselte kina inik kipiyal takotonilme nikwerit kaha mashishal wan anmehwanthe anmishtokayoltiloya inik amo ankipiyaloya takotonilme anmokwerit kaha anmashishal, in katka se taneshtiliste pa mochiwililoya yehwanthe pa nikwerpo ka nimahwam, ¹²shikilnamikik kimani amo anki'ishmatiloya Kristo, amo katkaloya nimasewalme Isra'El, wan amo ki'ishmatiloya nitaketsalisteYankwik ka nitatinewiliste Dyos yewal okichi ka Isra'El. Anyoliloya pa in tal kampa amo ki'ishmatiloya Dyos wan amo mochiyaloya pa yaloskya pa in takpakllwikak pa kimani mikiloskya. ¹³Ma yok, ashka ankat inak Kristo Yehshwa, anmehwanthe ankatkaloya wehka ka Dyos, kampa omik ototok niyEste Yehshwa-Kristo yok anmishasilti inak Dyos. ¹⁴Kampa Kristo otishmak tosewiliste, ika inik yudiyo' wan inik amo yudiyo' pa okichi se han pweblo, kwah omik pa kruskwawit yok okishitin in tepante yewal kintsakwiliyaya kampa mokwalanililoya. ¹⁵Ka nimikiliste Kristo okichi pa tamiskya nitakwihkwilol pa NitanawatilMoshé in kipiyya nitanawatilisteDyos, wan kipiyaloya oksek tachiwalme pa kichiwaloskya; yok niyok okichi ka inik yudiyo' wan inik amo yudiyo' pa mochiwaloskya in omente pweblo' pa se han, in omochiwil pa yewal isel, han kina masewalme tayankwililme. Wan yok okichi pa yeloskya ka sewiliste. ¹⁶Ma yok ka nimikiliste pa kruskwawit Kristo okichi pa tamiskya in kwalaniliste, yewal katka ika inik yudiyo' wan inik amo yudiyo', okichi pa yeloskya in omente se han kwerpo wan yok okichi pa kipiyaloskya sewiliste inak Dyos.

¹⁷Kristo owal wan kinmili tamashtilisteKwal ka sewiliste pa moshte anmehwanthe ankatkaloya wehka ka Dyos, yok kina yehwanthe katkaloya inak Dyos. ¹⁸Kampa ika yewal Kristo

moshte inik yudiyo' wan inik amo yudiyo', moshte kwal pa timo'asiltiske ka toTatsDyos ka in se han EspirituSanto. ¹⁹Kampa yok anmehwante inik amo kat yudiyo', yahmo ankat kina ta walatyaloskya pa oksek talme wan mochantilme pa oksek pweblo' amo anmopweblo, hanwel ashka ankat pa in hanse pweblo inak inik nita'onanalme nitekipanolme Dyos wan ashka kat in nifamilya Dyos. ²⁰Wan anmehwante ankat kina se we kalchiwaliste, ankat ipa nitakon yewal kitalik inik tatitanilme wan inik niTaketsalme nitahtolmeDyos, pa in kalchiwaliste Yehshwa-Kristo onka in tet yewal nitsontek pa mochi kalchiwaliste. ²¹Pa Kristo mochi in kalchiwaliste, kwal mokalchipti wan mo'ahkoki pa mochiwas se tyopWe tatasot pa in Tats. ²²Yok niyok ankat tanichikolme pa Kristo, anmehwante inik amo yudiyo' wan inik yudiyo' ankat pa in kalchiwaliste kaha Dyos mochanti ika ni'EspiruSanto.

Dyos kititani Pawlos ka masewalme amo yudiyo'

3¹Yok nika newal, Pawlos, ni'onka tatsakwal kampa nitekpanol Yehshwa-Kristo ika kwal ka anmehwante amo kat yudiyo'. ²Anmehwante antakakik kampa Dyos ka nitasotalisteWe onishmak in tekipanoliste pa anmishpalewis anmehwante. ³Dyos onishmashti in ten kitatitikatka-ya pa kichiwaskya in amo'ak kimatiya, kina ta'ishpa annimishtakwihkwilolil tipit. ⁴Ta anmomashtik in, ten annimishkwihkwilil, ankimatiske kina nihmat in ten kitatitikatka-ya pa kichiwaskya Dyos in yewal amo'ak kimatiya inak Kristo, ⁵kampa Dyos amo okinmashtil inik yehwante yoliloya ta'ishpa kwah ayamo tikatkaloya in ten kitatitikatka-ya, ma yok ashka Dyos okinmashti ka inik yehwante nita'onanalme in tatitanilme wan niTaketsalme nitahtolmeDyos ika ni'Espiritu. ⁶In yewal ten kitatitikatka-ya pa kichiwaskya in amo'ak kimatiya: inik amo yudiyo' konanaske niyok nitakawaliste Dyos yok kina inik yudiyo', in ankat moshte omente pa se han nikwerpo Kristo, wan kipyaske nitatinewiliste Dyos yewal okichi pa Yehshwa-Kristo ika nitamashtilisteKwal.

⁷Ka in nitamashtilisteKwal onishmak Dyos tekipanoliste. Ina yewal nitemakaliste Dyos onishmak ka nitasotalisteWe, yok nichikawaliste tekipano ipa newal. ⁸Newal nika akyewal amo wenimonots kina inik oksek pa moshte nita'onanalme

nitekipanolme Dyos, ma yok kwal onishihnil Dyos pa nikkinnawatis yehwante amo yudiyo' in nitamashtilisteKwal yewal kipi miyak tamashtiliste pa Kristo wan yewal amo'ak kwal kipowas. ⁹Wan niyok onishtake pa annimishmashtiskya mochi, in yewal ten kitatitikatkaya pa kichiwaskya Dyos in amo'ak kimatiya, kampa yewal, kitatitikatkaya pa kimani ayamo kipewaltiyaya in mochiten ta'onka, kampa yewal okichi mochiten. ¹⁰In opan pa yehwante moshte inik patrone' pa taneltokal wan nichikawaliste pa inik kaha takpakIlwikak pa ki'ishmatiloskya nitamatiliste Dyos kina han, pa ika taneltokalme. ¹¹Hanwel in okital Dyos kwah ayamo'ok kipewaltiyaya mochiten wan okichi ika toTats Yehshwa-Kristo. ¹²Kampa titaneltokal pa Kristo, tikpiyal tamakawaliste pa timo'asiltiske ka Dyos amo tikpiyaske tamaptiliste. ¹³Ma yok annimish-tahtani pa amo'ik anmomakawaltiske ika in ten nipanotik ka in yolkokoliste pa anmehwante, hanwel, in yolkokoliste yes se tanotsaliste kwal pa anmehwante.

Nitasotaliste Kristo

¹⁴Kampa yok nimotankwakets pa niktaholtis i'ishpa nITATS in toTats Yehshwa-Kristo, ¹⁵ininTats moshte inik kishki kat pa in takpakIlwikak wan pa in tal kampa yewal okinchi. ¹⁶Wan yewal niktahani in ten miyak tapi ka nitawiliste pa anmishmakas anmehwante chikawaliste pa anmoyolme ika in Espiritu, ¹⁷kampa ka anmotaneltokaliste pa Kristo ma yol pa anmoyolme. Wan nitahtani kampa ma ye ninelwa wan nitakon ka tasotaliste, ¹⁸yok ankwak ankimatiske ankikakiske inawak ka moshte inik nita'onanalme nitekipanolme Dyos kishki patawak wan weyak, kishki takpak wan wehkat yok we tishtasot Kristo. ¹⁹Wan yok ki'ishmatiske nitasotaliste in Kristo, kampa in hyero we kitanili mochi kishki totamatiliste wan yewal kichi kampa mochi pa yes tatamilme wan kintemilti mochiten moteshmonektiyas.

²⁰Dyos ma tikipan ipa tehwanke ka nichikawaliste, yewal kwal pa kichiwas ka nichikawaliste in ten hyero miyak in yewal tehwanke amo'ik pa titahtaniloskya wan amo'ik pa tihmatiloskya tihkakiloskya. ²¹Pa kishki tonatim wan pa hanse ma tiktahtoltitiyak Dyos, tehwanke inik taneltokalme wan titik inak Kristo-Yehshwa! Yok ma ye.

In EspirituSanto otishchi se han pa Kristo

4 ¹Ma yok, nika newal, Pawlos, ni'onka tatsakwal kampa pa niktekipanoli in Tats, annimishtahtani pa anyoliske kina monek ka in tanotsaliste yewal anki'onanak pa Dyos. ²Shimo'itak kina amo wehwe monotsalme, wan niyok shitamawishtilitiyak wan amo hani shikwalanik, wan shita'ihnilitiyak ika anmehwante, wan kwal shimowikatiyak sek ka oksek ka tasotaliste. ³Monek pa amo anmomakawaltiske pa in se han taketskiltiliste in yewal kichi EspirituSanto ka in sewiliste pa anmoyololiste. ⁴Onka se han kwerpo wan se han Espiritu, wan onka se han tachiwaliste yewal pa tikchiyal yewal Dyos otishtenewil kimani otishnots. ⁵Wan se han Tats wan pa se han taneltokaliste wan pa se han takwatikiliste, ⁶onka se han Dyos yewal niTATS moshte, yewal tatake ipa moshte, wan tekipano ipa moshte wan yoli ipa moshte masewalme.

⁷Wan pa sesen tehwane Dyos otishmak tamatiliste in ten tihmatil tikchiwal, hanwel tishtamachi kina yewal kinek Kristo. ⁸Kampa yok kito nitakwihkwiloliste Dyos:

Dyos otehko kaha takpakIlwikak, niyok okinwik inik tatsakwalme,

wan Dyos okinmak tamatiliste in ten kimatil kichiwal inik masewalme.

⁹Ten kinek kitos in, kampa mo'ahkok kaha takpakIlwikak, in kinek kitos kampa ta'ishpa temowaya kaha hyero tatsinta pa in tal?^a ¹⁰Yewal otem isel, in yewal niyok otehko ipa mochi inik takpakIlwikak pa tatemiltiskya mochiten pa kaha han yeskya. ¹¹Ashka, yok yewal isel okinmak tamatiliste pa yeloskya sek kina tatitanilme wan oksek kina niTaketsalme nitahtolmeDyos wan oksek kina nitanawatilme nitamashtilisteKwal, wan oksek kina inik takwitawilme pa inintaneltokalme Kristo wan oksek kina tamashtinilme. ¹²Kampa okinmak tamashtiliste nita'onanalme Dyos pa kitekipanoliloskya wan pa mochikawaltiskya nikwerpo Kristo, ¹³yok yewal, pa kimani timo'asiltiske moshte pa in se taneltokaliste wan nitamatiliste nikon in Dyos, pa tiyeloskya kina se

^a4:9 In kinek kito kampa ta'ishpa otem pa in tatsinta kaha inik mihmihki.

takat kwal, hanwel pa timo'italoskya kina Kristo. ¹⁴Yok yahmo tiyeske kina piltontim, kampa pa watsinko tamatil pek ten wan pa tyotak okse, hanwel kwal kinkwahkwamanal ka in tamashtiliste amo melawak ka yehwante kimatil takwamanal. ¹⁵Ma tiyolik ka melawaliste ka tasotaliste, ma timo'apawak pa tinesiske pa mochi'as kina yewal in tsontek, in kinek kitos, Kristo. ¹⁶Yewal mochi in kwerpo kiteshmonek. Kampa ika yewal, mochi inik tahtahkito kat taketskilme ka in kwerpo; pa sesen inik kipiwal nitekipanoliste wan yok mochi in kwerpo mo'apapti wan mochikawaltiti ka nitasotaliste.

Se yoliliste yankwik pa Kristo

¹⁷Yok yewal annimichili in, melawak annimishtahtani ka ni'itokaliste in Tats: amo shiyolik kina inik amo ki'ishmatil Dyos, kina yehwante amo mo'ilnamiktiyaloskya ¹⁸kampa kipiwal ta'ilnamikiliste pa tatekomat wan amo kimatil takakil, katka ininyolme chikawak. Ma yok amo kipiwal yoliliste yewal wal pa Dyos. ¹⁹Kipolok mochi pinawaliste, kichiwal ten amokwal ka ininkwerpo wan hanse kinectiyaske kichiwaske katsawiliste. ²⁰Ma yok anmehwante amoyok anmomashtik pa Kristo, ²¹kampa melak anmehwante ankikakik nitamashtiliste Yehshwa wan ankimatil in melak yewal onka pa yewal. ²²Yok anmehwante kampa yahmo monek pa anyoliske kina kwah ayamo'ok anki'ishmatiloya Dyos, kampa anyoliloya yok kina ta antakemtiyaloskya shashalme taposhkawalme, in yewal kina se masewal amo ki'ishmat Dyos, yewal mokatsawalti nitakemtil ka in ten kinectiyas kichiwas ka katsawiliste, kampa yok shimokistilik in takemtiliste amokwahkwalme. ²³Shihmakawaltik in EspirituSanto pa anmishyankwilis pa anmota'ilnamikiliste, ²⁴wan yok kina se masewal motakemilti ka se shashal yankwik, anmehwante niyok shimotakemiltik ka in yoliliste yankwik yewal Dyos okichi pa annesiloskya kina yewal, pa ankichiwaloskya ten kwal kampa kimatiloya in melak.

Kina kwal anmochantiske pa se yoliliste yankwik

²⁵Kampa yok, amo shitikwamantiyak, shitaketstiyak melawak ka anmonihni, kampa moshte tehwane tikat kina se kwerpo, motakitskilitikat se ka nokse ika oksek.



© 1996 David C. Cook

*Pawlos kinchiwaya pa
kinnamakaya shashalme
tilawak ka mokalchiwililoya (4:28)*

26 Ta ankwalanik amo shikchiwak katsawiliste. Amo shikwalantiyak pa mochi tonat shimoyolsewik pa ayamo'ok tamalina tonat. 27 Amo shihkawilik yewal in tawalilot pa ankitilanas anmoyol.

28 Akyewal ta'ishtikiyaya, amo ta'ishtekis oksep. Hanwel ma tikipan kwal ka nimahwam pa kipiyan ten kintemakas yehwante amoten kipiyan.

29 Amo hyero shitahtotiyak, hanwel shikitotiyak hanse tahtolme kwah-

kwalm, yewal kinpalewis oksek pa mochikawaltiske kwal, wan ma ye ka tamashtiliste pa inik yehwante kikakiske.

30 Amo shikchiwak pa moyolkoko in EspirituSanto pa Dyos, yewal kina se seyo ka anyeske ta'ishmatilme pa Dyos okital pa anmehwante, pa kimani asis in tonat yewal Dyos anmishmakawas.

31 Shihkawak in ten amokwal mopi'ilitikat pa anmoyol amo shimokwalantik, amo shimokwalantitiyak pa anmomiktiske, amo shimotsatsilitiyak, amo shimotaketstiyak, wan shihkawak mochi'as ten amokwal anki'ahkoptikat pa anmoyol. 32 Kwal shimotasotatitiyak, wan shimota'ihnilitiyak, wan shimotahtantiyak ta'ihniliste sek ka oksek, yok kina Dyos anmishihnil anmehwante ika Kristo.

Kina monek pa yoliske ininpilwam Dyos

5 ¹Kampa yok shineshtiyak kina Dyos, kampa anmehwante ankat tatasotalme ininpilwam Dyos. ²Shinehnemtiyak pa se yoliliste ka tasotaliste, yok kina Kristo otishtasot wan motemak pa tehwan kina temakaliste wan kina tamiktilliste tachichinoliste ka ahwiyalisteKwal pa Dyos.

³Anmehwante ankat nita'onanalme nitekipanolme Dyos, kampa amoyok shikchiptiyak ika in ten amokwal kina ka

in amo tasiyawatilme^b motekal sek ka oksek, wan kichiwal mochten ka in katsawiliste, niyok amoyok shikchiptiyak ika in ten kinectiyaske kipiwaske mochten. ⁴Niyok amo hyero shikitotiyak, amo shitaketstiyak kina ta amo mo'ilnamik-tiyaloskya, amo shimolokotitiyak, kampa anmehwante yahmo anmishpanti pa yok ankitotiyaske, ma yok, shihmakak tashtawaliste ka anmokamak in Dyos. ⁵Kwal ankimatil anmehwante aki kichi ka in ten amokwal, kina ka in amo tasiyawatilme^c motekal sek ka oksek, wan niyok aki kichi katsawiliste, wan niyok aki kinectiyas tapiyas hyero miyak, kampa yewal niyok kina ta motankwaketstiyaloskya pa in santo tachiwalme ka tal, wan yewal amo kipiwas takawaliste pa in reynaroliste ka Kristo wan ka Dyos.

Shiyolik ka nitaneltokaliste Dyos

⁶Kampa pa amo'ak anmishkwamanas ka akyehwante kitotiyaske amoten mishpanos kampa moshte yok kichiwal katsawiliste, kampa Dyos kinkokolti yehwante inik amo kimatil taneltokal. ⁷Yok yewal amo shimonelok inak yehwante kitotiyaske moshte kichiwal katsawiliste wan amoten anmishpanos.

⁸Kampa anmehwante pa ya wehka katkaloya pa tayowaliste, ma yok ashka ankat pa nitawiliste in Tats. Shiyolik kina nipilwam tawiliste, ⁹kampa in nitawiliste kichi pa kichiptiyaske ten kwal, pa yaptiyaske melahka wan melak. ¹⁰Shihmatik shikchiwak ten yewal kwal kiwetsi in Tats. ¹¹Amo shikchiwak ten amokwal yewal inik kichiwal masewalme kwah tayoway. In kwalik ten amokwal; hanwel shikchiwak ten kwal pa ankinestiske kampa yewal ankichiwal pa tayoway amo kat kwahkwalmel. ¹²Kampa temak tapinawaliste pa hanwel kitenewaske in ten kichiwal yehwante ka tatiliste; ¹³kimani in tawiliste tawi, mochten nesi.

¹⁴Kampa in tawiliste kineshti mochten. Kampa yok kito:

Shi'is, tewal tikoshtik,
shimokets ika inik mihmihke,
wan Kristo mishtawilis.

^b 5:3 "Adulterio" in kinek kitos: ta se takat wan ta se siwat kat tasiyawatilme wan motekal ka yewal amo nitaka wan amo nisiwa.

^c 5:5 "Adulterio" in kinek kitos: ta se takat wan ta se siwat kat tasiyawatilme wan motekal ka yewal amo nitaka wan amo nisiwa.

¹⁵Yok yewal kwal shimokwitaptiyak. Amo shiyolik kina ta amo mo'ilnamiktiyaloskya hanwel shiyolik ka tamatiliste. ¹⁶Shikchiwak pa hanse tonatim ten kwal, kampa tiyoltikat pa inik tonatim amokwahkwalme. ¹⁷Amo shiyek kina amo ankipiyaloskya ta'ilnamikiliste, hanwel shihmatik shikchiwak ten yewal kinek in Tats pa ankichiwasse. ¹⁸Amo shitawanik ka nihugoUbaBino, kampa yok ankipoloske anmota'ilnamikiliste, hanwel shimotemiltilik ni'Espiritu Dyos. ¹⁹Shitaketsak sek ka okse ka tatsotsonaliste ka taketsaliste pa nitahtolDyos wan shitatsotsonak tahtolme wehwe pa Dyos, shikantarok hanwel kina temak in EspirituSanto. Shikantarok wan shiktahtoltik in Tats ka mochi yololiste. ²⁰Shitemakatiyak hanse tashtawiliste pa Dyos in Tats pa ten han, ka ni'itokaliste toTats Yehshwa-Kristo.

Kina monek pa tiyoliske pa to'icha

²¹Shimoneltokatiyak sek ka oksek, ka tamawishtiliste pa Kristo.

²²Siwam tasiyawatilme ma kichiwak kina kito nitawikal yok kina ankichiwal ka in Tats. ²³Kampa Dyos okital nitawikal kina tsontek kampa yewal kipiya tatakewaliste ipa nisiwa, yok kina Kristo onka in tsontek ka tatakewaliste ipa inik taneltokalme, yewal kat kina nikwerpo wan yewal okinmaka; ²⁴ta inik taneltokalme kimatil kichiwal ka taneltokaliste pa Kristo, yok niyok inik siwam tasiyawatilme monek pa kinneltokaske inintawikal pa mochten.

²⁵Inik takam tasiyawatilme, shikinnekik anmosiwam yok kina Kristo okintasot inik taneltokalme wan otimak niyoliliste ka yehwante. ²⁶Pa mokawiliskya isel, yewal okinpohpo ininta'htakoliste, wan okinpak ka at ika nitahtolmeDyos, ²⁷yok okichi Kristo pa kinneshtiliskya inik taneltokalme ni'ishpa yewal kina se siwat yewal monamiktiskya ka nikoton wan ninawa tipitawak, han amo katsawak, han amo pipilishtik han amo yok neshtiyaskya, hanwel chipawak. ²⁸Yok niyok monek pa takam tasiyawatilme pa kinnekiske ininsiwam yok kina kinnekil iselte ininkwerpo. Inik aki kintasotal ininsiwam yok motasotal iselte. ²⁹Kampa amo'ak ki'ihya se isel nikwerpo. Hanwel, kitamak wan kikwitawi, yok kina Kristo kinkwitawi inik taneltokalme, ³⁰kampa melawak pa sesen tehwanse tikat

taketskilme pa nikwerpo Kristo. ³¹Wan Dyos nitahtol kito: “Kampa se takat kikawas nitats wan ninantsi pa motakitskiltis inak nisiwa wan in omente yeske kina se han masewal.” ³²In tatiliste hyero we, ma yok newal nihnek nikitos ka in, ika in Kristo wan ika nitaneltokalme. ³³Yok niyok ma ye pa sesen anmehwante, shiktasotak mosiwa kina anmoselte wan yewal in siwat ma kimawishtil nitawikal.

Kina monek pa mowikaske inintahwan ka ininpilwam

6 ¹Anmehwante pilwam taneltokalme pa Kristo monek pa ankinneltokaske anmotahwan, kampa yok monek. ²“Shikmawishtilik motats wan monantsi”, ina yewal se ta'ishpa nitanawatilisteDyos yewal kipi se tatenewiliste: ³“yok anmish-tayaptiyas kwal pa mochiten wan wehka tiyoltiyas pa in tal.”^d

⁴Anmehwante, antatsim, amo shikinkwalantik anmopilwam, hanwel kwal shikintakichiliyak pa yok kwal mo'apaptiyaske wan shikinnawatik kina kinek in Tats pa anmochantiske.

Kina mowikatiyaske inik tekipanolme kat kina tatsakwalme inak ininwehwetatakewalme

⁵Anmehwante in tekipanolme kat kina tatsakwalme,^e shikinmawishtilik ka tamaptiliste anmotatakewalme nika pa tal. Shikinneltokak ka miyak tamawishtiliste wan shikinmaptilitiyak yehwante, wan shitekipanok ka mochi moyololiste kina ta ankitekipanolitiyaloskya in Kristo.

⁶Amo shitekipanotiyak hanwel pa kimani yehwante anmichitatiyaske pa anmokawaske kwal ka yehwante, hanwel kina sek tekipanolme yehwante kat kina nitatsakwalme Kristo, monek pa ankichiwaskes ka mochi anmoyol ten yewal kwal kiwetsi Dyos. ⁷Shitekipanok kwal, kina ta kitekipanolitiyaloskya in Tats wan amo inik masewalme. ⁸Ankimatil kampa in Tats kintemakas temakaliste pa sesen pa in ten kwal kichiwak, ta

^d6:3 IKe.20:12 in kinek kito: Isra'elita kisak pa Egipto/Éxodo; TaNiD. 5:16 in kinek kito: Ta'ilnamikiliste nitahtolmeDyos/Deuteronomio.

^e6:5 Takam takowalme wan tanamakalme in kinek kitos, katkalo-loya kina tatsakwalme, mochi'as tekipanoloya pa hanse tonatim ka ininwehwetatakewalme.

yok yeskya se tekipanol yewal onka kina tatsakwal wan ta yok yeskya se tamakawal.

⁹Yok anmehwante wehwetatakewalmeDweño, niyok kwal shikinchiwilik anmotekipanolme kat kina tatsakwalme, amo shikinmahmaptityak. Shikilnamikik kampa yehwante wanan mehwante ankipiyal in se han Tats pa in takpakllwikak wan yewal kinmit kina ta yeloskya kina moshte.

**Shimopalewik ka in mochten
moteshmonek yewal Dyos temak**

¹⁰Ashka shimochikawaltik ka niwechikawaliste in Tats.¹¹ Shimotsakwilik ka in mochten moteshmonek pa se mo-mikti liste ka yewal Dyos anmishmak, kina se gwacho motsakwilik ka inmo chiten mopalewi, kampa yok melahkama moketstiyak pa yok nitekwamanaliste in tawalilot amo anmishmayawis an mehwante. ¹²Kampa amo timomiktitikatika masewalme ye hwante kipiyl yEste wanna kat, hanwelika nitatakewalme pa trone' pa yewal taneltokal, wan ika ta-takewalme ka podero liste amone sil kampa kichiwaloya kinakinekiLOYA niyehye katim tawalilom, wan ika wetatakewa-liste ka chikawaliste pa in tal

tatekomat wan ika niyehye-katim tawalilom pa in llwikak.

¹³Kampa in, shimotsakwilik ka in mochten moteshmonek pa se momiktiliste ka yewal Dyos anmishmak wan yok amo anmishmayawis kimani anmopanoltiske in tonat amokwal, wan amo shimomakawaltik pa anmish-tanilis wan hanse shiyek melahka. ¹⁴Shiyek hanse melahka! Ashka shimo'lpik ka in takwehtiliste in melawak han nitaketsal Dyos, wan hanse shikchiptiyak melawak kwal, yok in yewal kina ta anmotsakwilitiyaloskya ka

Esta ilustración
no está
disponible.

*Kina se gwacho motakemilti
ka in ten motsakwili ka
ya momikti (6:14)*

in fyerro yewal kiwik se gwacho pa nipecho. ¹⁵Shitachish-tiyak pa anyaske ankimashtiske nitamashtilisteKwal Dyos yewal temak sewiliste, yok kina se gwacho kwah mochish-tiyas kintali niwarachim. ¹⁶Wan yok niyok shimotsakwilik ka anmotaneltokaliste kina ta anmotsakwilitiyaloskya ka in eskudo yewal kiwik ta'ishpa se gwacho, pa ankwal ankin-sewiske mochi inik nitamitiliste tatatitikat yewal kiwaltas tawalilot. ¹⁷Shikonanak nitamakawaliste Dyos yewal ma anmishtsakwil kina se kasko pa anmotsontek, wan yewal ma anmishpale nitahtolmeDyos, yewal in kina se teposte yewal anmishmak in EspirituSanto. ¹⁸Hanse shiktahtoltitiyak Dyos, ka nitapalewiste in EspirituSanto, ka mochiten shitahtok wan ka miyak tahtaniliste. Hanse shitachishtiyak, amo'ik shimosyawiltik pa ankitahtoltitiyaske Dyos pa moshte kishki nita'onanalme nitekipanolme Dyos. ¹⁹Wan shihtahtoltik Dyos pa newal, pa yok nishmakas tahtolme kwah newal nitahtos, kampa kwal nitahto amo ka tamaptiliste, pa nikinnawatis nitamashtilisteKwal wan akyewal kikakis, in amo'ak kima-tiya ten kitatitikatka Dyos. ²⁰Ashka ni'onka tatsakwal ka kadena, kampa nikintakichilitinem nitamashtilisteKwal Dyos kina nitatitanil Kristo. Annimishtahtani anmehwante pa ankitahtaniske Dyos pa newal pa amo nimomaptis nitahtos ka masewalme ipa Yehshwa-Kristo kina monek pa nikchiwas.

Nitahpaloliste Pawlos

²¹Tonohni tasotili Tihiko', se yewal taneltok nitekipanol in Tats, yewal anmishmashtis ka in mochiten nikchiptik newal wan ka in mochiten nishpanotik. ²²Annimishtitanili anmehwante pa ankimatiske kina ta'onka ka tehwan, pa anmishchikawaltis pa anmoyolme anmehwante.

²³Kampa Dyos in TATS wan in Tats Yehshwa-Kristo, ma kinmak tonohniwan sewiliste, wan tasotaliste wan taneltokal-iste; ²⁴ma ye nita'ihniliste ka moshte kishki kitasotal toTats Yehshwa-Kristo ka tasotaliste yewal amo'ik tamis, yok ma ye.

